

# INUIT ATAQATIGIIT

## Inatsisartuni



17. februar 2020

UPA2020/40

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Illorsuit aamma Nuugaatsiap ammaqinneqarnissaannut periarfissanik qulaajaanermik misissuinermik Naalakkersuisut suliaqarnissaannik Inatsisartut aalajangiiffigisassaattut siunnersuut. Misissuinerup upalungaarsimanermit misissuutit nalunaarasuartaatillu pilersinnerisigut Illorsuit aamma Nuugaatsiap ammaqinneqarnissaannik qulakkeerinninnissaq nalilersussavaa, tassungaannarli killissanani. Misissuineq GEUS-ip nalilersuinerata massakkut ingerlasup naammassinerani paasisat piareernerat ilutigalugu ingerlanneqassaaq.**

(Inatsisartunut ilaasortaq Aqqa Samuelsen, Inuit Ataqatigiit).

### **Tunnqavilersuut:**

Karrat kangerluanni tassaarsuortoqarnerani ullormi ilungersunartumi tupannaqisumilu inuiaqatigiit tamarmik eqqorneqaatigisaat ulloq manna suli eqqarsaatitsivut qaffakaajuarpoq. Tassaarsuortoqarnerata nalaani isumakulunnerit, ernumanerit misigissutsitigullu qisuariaatit tamatsinnut sakkortusimaqaat, misigissutsillu qanoq oqaasertalernissaat nassuiaruminaassimallutik.

Nuugaatsiami Illorsuarnilu innuttaasut imminnut qanigisariillutik susassareqatigiillutillu ukiorpasuarini inooqatigiissimanerat piffissap sivikitsup ingerlanerinnaani pinngortitarsuup nunaqarfiit pineqartut piuneerullugit qamuuna attortinnarsimaqisoq, maanna nunaqarfiit pineqartut ammaqinneqarnissaannut pilersaarummik Naalakkersuisut aallartisarnissaat piffissanngorpoq.

Nuugaatsiaq aamma Illorsuit ammaqinneqarnissaannut pilersaarummik Naalakkersuisut aallartitsinissaat pissutissaqarluarpoq.

Tassaarsuarmit eqqugaasut angerlarsimaffittaartinneqartussanngornerat ilutigalugu Nuugaatsiap Illorsuillu eqqaanni qaqqani annertuumik sisoorsinnaaneramik aarlerinaatilinni tassaarsuortoqarnissaanullu upalungaarsimanermit pilersaarusioreq ilutigalugu Nuugaatsiaq aammalu Illorsuit nunaqarfittut ammaqinneqarnissaannut sukumiisumik pilersaarutitik Naalakkersuisut misissuissuippata alloriarneq annertuujussaaq.

Annertuumik qaqqanik sisoortoqarsinnaaneranut misissuinerit kalerrisaarutillu pillugit § 37 naapertorlugu apeqquteqaammut nr. 269-imut akissummi<sup>1</sup> ima allassimasoqarpoq: *”Misissuinermit paasineqarpoq, Karrat Kangerluanni qaqqanik annertuumik sisoortoqarsinnaanera suli ulorianaateqartorujussuusooq. Sumiiffimmi sumiiffiit pingasut ulorianartorsiorfiusutut*

<sup>1</sup> [https://ina.gl/documents/para3637/2019/svar/269\\_2019\\_Nuugaatsiaq\\_og\\_Illorsuit\\_AQQS\\_akissut.pdf](https://ina.gl/documents/para3637/2019/svar/269_2019_Nuugaatsiaq_og_Illorsuit_AQQS_akissut.pdf)

# INUIT ATAQATIGIIT

## Inatsisartuni



*naliliiffigineqarput. Tamatuma saniatigut misissuinermit paasineqarpoq, nunatsinni sumiiffiit (qaqqaqarfiit) allat 15-it qaqqat sisoornissaannik annertuumik imaluunniit annertoorsuarmik ulorianartorsiorfiusut. Taamaattumik qaqqat taakku ukiut tulliit pingasut ingerlanerini sukumiisumik misissuiffigineqassapput.*

*Sumiiffiit ulorianartorsiorfiusut misissuiffigineqarnerat killiffigineqarpoq. GEUS misissuinermit ingerlatsisusooq ilisimatitsivoq, 2021-mi piffissaq orniguttarluni misissuiffiusooq naamassitinnagu misissukkat inernerinik inerniliiffiusunik piareertoqarnissaa naatsorsuutiginnikkitsik.”*

Nuugaatsiarmiut Illorsuarmiullu piffissami aggersumi nunaqarfimminnut angerlaqqissinnaanissartik kissaatigaat, nunaqarfiillu pineqartut ammaqqinnissaannut pilersaarummik sukumiisumik paasisaqarusullutik. Tamanna partiinut tamanut pisinnaasunut Nuummi saqqummiuppaat, ilaatigut kissaateqarlutik Illorsuit ammaqqinneqarnissaat piviusorsioortumik sulissutigisariaqartoq.

Tassaarsuortoqarnerani inoqutigiit eqqugaasut nunaqarfimminnut angerlaqqinnissaminnut oqariartuutaat paasinarluarput. Nunaqqatigiullutik pisup kingorna maannakkut inuttut inissisimaffigisaat ajorseriaateqarsimapput, sualummik inuussutissarsiutitigut pissaqassutsikkullu inissisimanerliornerat eqqarsaatigissagaanni, tamannalu akiligassatigut ulluinnarnilu atukkatigut kalluaanera maluginngitsoorneqarsinnaanani. Tassaarsuortoqarnerani inoqutigiit qimagussorneqarmata avissaartuussimapput, pisanik tunisiniarnikkut erloqinartua arlaqartut malugivaat imminnut pilersorniarnissamut ajoqutaasooq, tassami Illorsuarni aalisartut ingerlalluarlutik tunitsivissaaleqinatik ingerlasimagaluarmata. Pisup kingorna annertuumik ingerlanerliornerulerneq, assoroornerulerneq pineqartut uppersaatissaqartippaat, kiisalu nunaqarfinnguaminnut inuussutissarsiornikkut ingerlalluarfigisartakkaminni toqqissillutik angerlarsimaffimminnut angerlartinneqarnissamik pilersaarusiornissaa kissaatigalugu.

Nuugaatsiaq Illorsuillu ammaqqinneqarnissaannut Naalakkersuisut Inatsisartullu suleqatigiittariaqarput.

Suliassaq imaannaangitsuvoq misissuinermillu sukumiisumik suliqartoqarsimatinnagu imaaliallaannaq nunaqarfiit pineqartut ammaqqinneqarnissaat piviusorsioortuunani. Qaqqat annertuumik sisoorsinnaanerinik tassaarsuortoqarnissaanullu upalungaarsimanermit pilersaarusiortoqassappat nunaqavissut Illorsuarmiut Nuugaatsiarmiullu qanimut suleqatigineqartariaqarput, nunaqarfiillu pineqartut qanoq ammaqqinneqarnissaasa misissuiffiginissai ersarissumik nassuiarneqartariaqarluni.

Inoqatinnguavut ajunaarnersuarmik eqqugaasimasut nunaqarfimmini isumannaannerpaamik inuuneqarnissaannik pilersaarusiortuarneratigut, nunaqarfiit pineqartut ammaqqinneqarnissaat piviusunngortittariaqarpoq, tassaarsuortoqarneranilu inoqutigiit eqqugaasut pitsaanerpaamik

# INUIT ATAQATIGIIT

## Inatsisartuni



isumannaannerusumillu nunaqarfimmini inuunerup nalinginnaasup nassaareqqinnissaanut toqqammavissanik pilersitsisoqartariaqarluni.

Taamaattumik GEUS nalilersuilluni naammasseriarpit Illorsuit aammalu Nuugaatsiaq ammaqinneqarnissaannut immikkoortillugit misissuinermit Naalakkersuisut piaartumik aallartitsiumaarnissaannik Inatsisartut aaliangiiffigisassaattut siunnersuut taamaalillugu Inatsisartunut Naalakkersuisunullu saqqummiuppara.

### **Pisortanut aningaasatigut allaffissornikkullu kingunerisassai:**

Misissuinermit AC-itut ilinniarsimasup ukiumut naammassisinnaasaatut annertugissasoq missingersorneqarpoq. Avataaneersunut paasisutissanik piniartariaqarsinnaaneq mattunneqarsinnaangilaq.

### **Namminersortunut aningaasaatigut allaffissornikkullu kingunerisassai:**

Soqanngilaq.

### **Innuttaasunut aningaasatigut allaffissornikkullu kingunissai:**

Soqanngilaq.